

Powšitkowne WOZJEWJENJA

njedźelu, 20. oktobra 2024

Duchowna hudźba

Budyska Katolska tachantska wosada a Towarstwo tachantska hudźba přepróšujetej wšitkich zajimcow na nyšpor duchowneje hudźby do tamnišeje tachantskeje cyrkwyje. Na nim předstajitej tutu njedźelu, 20. oktobra, we 18.00 hodź. hudźbny duo Enßle-Lamprecht ze Salzburga a Weimara kaž tež Susanne Ansong jako hósć „Nikodemusowy pasion“. Zastup je darmotny. Po tym budže kolekta. Link k dalším informacijam je pod www.posol.de podaty.

Na sinfoniski koncert do Budyšina

Twórby serbskeju komponistow Jurja Pilka a Bjarnata Krawca steja w srjedzišću 1. sinfoniskeho koncerta Budyskeho Serbskeho ludoweho ansambla (SLA) njedźelu, 20. oktobra, w 17.00 hodź. na tamnišej žurli. Mjez druhim zaklinča kompozicija Jurja Pilka pod titulom „Elegija“ kaž tež „Šěsć serbskich rejow za sinfoniski orchester op. 77 c“ Bjarnata Krawca. Na kóncu koncerta diriguje nowa nawodnica orchestra SLA Katharina Dickopf „Sinfoniske reje op. 45“ ruskeho komponista Sergeja Rachmaninowa. Wšitcy zajimcy su wutrobnje přepróšeni. Zastupne lisćiki za koncert móža sej zajimcy w SLA abo online kupić. Wotpowědny link je pod www.posol.de podaty.

Filmowy wječork w ekumeniskim wobchodźe

Na předstajenje filma „The Quiet Girl“ pónđzelu, 21. oktobra, w 19.00 hodź. přepróšuje Budyski Ekumeniski tachantski wobchod do swojich rumnosćow Při mjasowych jětkach w Budyšinje. „The Quiet Girl“ (Ćicha holca) je filmowa drama Colma Bairéada, kotraž swjećeše w februaru 2022 we wobłuku Berlinskich filmowych swjedženskich hrow swoju premjeru a bu jako přěni irskorěčny film za „Oscar“ nominowana.

Serbske kemše w Drježdžanach

Drježdžanscy Serbja su na maćernorěčnu Božu mšu njedźelu, 27. oktobra, w 16.00 hodź. do cyrkwyje swjateho Antonija na Bünauskej 10 přepróšeni. Kemše swjeći farar Gabriš Nawka. Přizamknje so bjesada.

Literarna kofejownja

Přichodna literarna kofejownja w Budyskim ekumeniskim tachantskim wobchodźe budže pjatk, 1. nowembra, we 18.30 hodź. Serbska spisowaćelka Měrana Cušcyna čita basnje a krótkopozu z jeje knihi „innen bröckelt die unerhörte schicht“. Zastup je darmotny, wo dary proša.

Prěnjowoprawjenske džěci přepróšene

Dekanatne dušepastyrstwo přepróšuje wšitke džěci, kotrež so na přěnje swjate woprawjenje přihotuja, na zhromadny džěń srjedu, 20. nowembra, wot 9.00 do 15.00 hodź. do Njebjelčic. Započatk je z Božej mšu w cyrkwi. Zajimcy njech so hač do pónđzele, 21. oktobra, online přizjewja. Link je pod www.posol.de podaty. Za wudawki dnja zběraja wot kóžděho wobdźělnika přinošk pjeć eurow.

Wosebitej koncertaj w Kulowje a Drježdžanach

Drježdžanski orchester Sinfonietta a tři wosadne chóry tamnišeje wosady swjateje Hilžbjety předstaja sobotu, 2. nowembra, w 17.00 hodź. w cyrkwi Jězusoweje wutroby w Drježdžanach a njedźelu, 3. nowembra, w 16.00 hodź. w cyrkwi swjateje Marije donjebjeswzača w Kulowje „Rekwiem c-moll“ italskeho komponista Luigija Cherubinija. Dirigować budžetaj ćelesa regionalny kantor Stephan Thamm a Manuel Rotter. Wšitcy zajimcy su přeprošeni. Zastup je wobaj dnjej darmotny, wo dary proša.

Samotnosť jako tema přednoška a rozmołwy

Wo problematice samotności budže psychologa Raphael Schütz z Braniborskeje Technische uniwersity w Choćebuzu štwórtk, 24. oktobra, we 18.30 hodź. w Šěrachowskej wosadnicy, Am Kirchberg 4, přednošować. Tež potrjechena wosoba wo swojich nazhonjenjach porěči. Hornjołužiske telefonowe dušepastyrstwo jako zarjadowar přeprošuje k tomu zajimcow, potrjechenych a přiwuznych, zo bychu wjace wo temje zhonili, kotraž je w towaršnosći husto tabuizowana.

Modlenje při kopolaku

Na modlenje swjateho różowca při kopolaku za Hanku Šěrcec a na wopominanje wšěch přescěhanych su wěriwi sobotu, 9. nowembra, do Hórkow přeprošeni. Započatk je w 17.00 hodź. při Elic statoku na Chróšćanskej 17. Mjeztym džesać lět kopolak na dóńt Hanki Šěrcec dopomina.

TCM prosy za wopory powodženja w Pólskej

Dwě wosadže w Pólskej, kotrejž stej wot powodženja jara sylnje potrjechenej, chce Towarstwo Cyrila a Metoda z.t. (TCM) ze swojej akciju „Łužica pomha“ podpěrać. Kontakt k nim nawjaza wone přez swojeho kruteho partnera w susodnym kraju, prelata dr. Dariusza Kruczyńskeho. Wón ma jako direktor Carity w Ełku zwisk k direktoram druhich biskopstwow a je tak zhonił, kak móhli we wosadomaj Ustroń Śląski a Głuchołazy najlěpje pomhać. Trjebaja tam předewšěm elektriske nastroje, kotrež buchu dospołnje zničene, na přikład chlódžaki a płokawy. Wón na to skedźbnja, zo su předewšěm seniorojo wot podpěry wotwisni. Štóž chcył wot powodženja domapytanu ludnosć podpěrać, njech přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „wulka woda“. Štóž sej darowansku kwitowanku přeje, měł swoju adresu podać, pak telefonisce pod čisłom (0 35 91) 55 02 10 pak z mailku na TCM@Posol.de.

Podpěru za projekty prawje požadać

Norman Reitner z Drježdžanskeho biskopskeho ordinariata poskičuje na próstwu Towarstwa Cyrila a Metoda z.t. (TCM) kurs, kak móžeš projekty derje planować a k tomu na wšelakore wašnje pjenjezy požadać. Dalekubłanje na polu sponsoringa a fundraisinga wotměje so sobotu, 9. nowembra, wot 9.00 do 16.00 hodź. na „Radlubinje“ w Ralbicach. Wobdželić smě so maksimalnje 30 wosobow. By-li zajim wjetši był, by so TCM wo dalše zarjadowanje prócowalo. Jědź a napoje budu přihotowane. Zajimcy – nimo člonow TCM su tež dalši přeprošeni – měli so online přizjewić. Link na to je pod www.posol.de podaty.

Putnikowanje do Krupki

Pěše putnikowanje młodostnych do Krupki wotměje so klětu wot njedźele do pjatka, 20. do 25. julija. Putniske kemše budu srjedu, 23. julija, w 10.00 hodź.

Pomocna akcija „Łužica pomha“

Towarstwo Cyrila a Metoda z.t. (TCM) chce tež lětsa ze swojej nazymskej akciju „Łužica pomha“ diecezanskemu zwjazkej Charity w pólskim Ełku zaso pomhać. Tam wjesela so nade wšěm, štož w swójbje trjebaš, kaž su to drasta, črije, artikle hygieny a kosmetika za žony a dźěći, ale tež płokanski próšk, kuchinske graty abo pampersy za dźěći runje tak kaž za dorosćenych. Wotedać hodža so dary pjatk a sobotu, 8. a 9. nowembra, kaž tež pjatk a sobotu, 15. a 16. nowembra. Dokładnišo so to sčasom wozjewi.

Mandźelskej seminaraj

Seminaraj k přihoťej na sakrament mandźelstwa wotmějetej so klětu stajnje pjatk a sobotu, 7. a 8. februara kaž tež 28. a 29. nowembra, w Smochčanskim kubłanišću swjateho Bena. Přizjewjenja přijimuje dekanatne dušepastyrstwo młodžiny we Worklecach hač do srjedy, 8. januara, online. Link je pod www.posol.de podaty.

Nowy termin za přěni džěl přichodneho kursa JuLeiCa

Přěni džěl přichodneho wukubłanja JuLeiCa, kotrež poskići Worklečanske dekanatne dušepastyrstwo za młodžinu, njebudže kaž dotal připowědžene klětu w januarje, ale hakle wot pjatka do njedzele, 4. do 6. apryla, w Smochčanskim kubłanišću swjateho Bena. Druhi džěl wotměje so, kaž planowane, wot 25. do 27. apryla na samsnym městnje. Wobaj terminaj stej z přenocowanjom a połnym zastaranjom. Zajimcy maja zdobom dopokazać, zo su so na kursu přěnjeje pomocy wobdźělili. Tajki přewjedu sobotu, 15. měrcy, we Worklečanskim Don Boskowym domje. Za wobdźělnikow kursa JuLeiCa je wón darmotny. Certifikat služi tež jako dopokaz za jězbnu šulu. Přizjewjenja za wšitke tři terminy su hač do srjedy, 8. januara, online móžne. Link na wotpowědnu stronu je pod www.posol.de podaty.

Wohnjowi wobornicy do Čěskeje přeprašeni

Předsyda čěskeho Zjednoćenstwa swjateho Floriana Josef Bis a farar Jakub Polívka přeprašujetej serbskich wohnjowych wobornikow na mjezynarodne putnikowanje z Božej mšu na čěsc jich patrona, swjateho Floriana. Kemše budu sobotu, 9. nowembra, w 10.00 hodž. w cyrkwi swjateje Katyrny w Horním Rovenju. Tam wotkryja nimo toho pomjatne městno čěskeho wohnjowego wobornistwa. Patronat je čěski ratarski minister Marek Výborný přewzał. Štóž so wobdźěli, měł w swojej uniformje přińć. Zajimowane wohnjowe wobory měli so hač do srjedy, 30. oktobra, pod adresu asociace.svateho.floriana@seznam.cz přizjewić.